




全唐詩話

二

土岐文庫
文庫17
W 80
2



文庫 17
W80
2



昭和六十年二月一日
土岐善唐氏寄贈

010185184126



全唐詩話卷之二 東坡東坡長白首一犬主其歲
劉長卿 韋風錄矣

劉長卿字文房。至監察御史。以檢校祠部員外郎為
轉運使判官。知淮南鄂岳轉運留後鄂岳觀察使。吳
仲孺誣奏貶播州南巴尉。會有為之辯者。除睦州司
馬。終隨州刺史。以詩馳聲上元寶應間。皇甫湜云。詩
未有劉長卿一句。已呼宋玉為老兵矣。語未有駱賓
王一字。已罵宋玉為罪人矣。其名重如此。

高仲武云。長卿員外有吏幹而犯上。兩度遷謫。皆自取之。詩體雖不新奇。甚能鍊飾。十首已上語意稍同。於落句尤甚。此其短也。然春風吳草綠。古木剡山深。明日滄洲路。歸雲不可尋。又沙鷗驚小吏。明月上高枝。又細雨濕衣看不見。閒花落地聽無聲。截長補短。蓋玉微之類歟。又得罪風霜苦。全生天地仁。傷而不怨。亦足以發揮風雅矣。

過張明府別業云。寥寥東郭外。白首一先生。考滿孤

琴在。家移五柳成。夕陽臨水釣。春雨向田耕。終日空林下。何人識此情。

餘干旅舍云。搖落暮天迥。青楓霜葉稀。孤城向水閉。獨鳥背人飛。渡口月初上。鄰家漁未歸。鄉心正欲絕。何處擣寒衣。

送李中丞之襄州云。流落征南將。曾驅十萬師。罷歸無舊業。老去戀明時。獨立三朝盛。輕生一劍知。茫茫江漢上。日暮欲何之。

送嚴士元云。春風倚棹闔閭城。水國猶寒陰復晴。細雨濕衣看不見。閒花落地聽無聲。日斜江上孤帆影。草綠湖南萬里程。東道若逢相識問。青袍今已誤儒生。

章八元

八元題慈恩塔云。七層突兀在虛空。四十門開面面風。却怪鳥飛平地上。自驚人語半天中。迴梯暗踏如穿洞。絕頂初攀似出籠。落日鳳城佳氣合。滿城春樹

雨濛濛。或云。元白見其詩曰。不謂嚴維出此弟子。高仲武云。八元嘗於郵亭偶題數句。蓋激元楚以辭家。維大異之。遂親指喻數年。元賦擢第。至如雪晴山脊見。沙淺浪痕交。得山水狀貌也。八元睦州人。登大曆進士第。

韋應物

李肇國史補云。開元後位卑而名著。李北海邕。王江寧。昌齡。李館陶。鄭廣文。虔。元魯山。德秀。蕭功曹。穎士。

張長史旭。獨孤常州。及崔比部元翰。梁補闕肅。韋蘇州其一也。應物仕宦本末。似止於蘇。按白傳。答禹錫云。敢有文章替左司。謂應物也。官稱亦止此。

郡齋雨中與諸文士燕集詩云。兵衛森畫戟。燕寢凝清香。海上風雨至。逍遙池閣涼。煩疴近消散。嘉賓復滿堂。自慚居處崇。未覩斯民康。理會是非遣。性達形跡忘。鮮肥屬時禁。蔬果幸見嘗。俯飲一杯酒。仰聆金玉章。神歡體自輕。意欲凌風翔。吳中盛文史。群彥今

汪洋方知大藩地。豈曰財賦疆。

欲持一瓢酒。遠寄風雨夕。句萬籟自生聽。太空常寂

寥。還從靜中起。却向靜中銷。詠聲山深松子落。幽人

應未眠。句舟泊南池雨。簾捲北樓風。句右張為取作

主客圖

應物寄全椒山中道士云。今朝郡齋冷。忽憶山中客。澗底拾枯松。歸來煮白石。欲持一瓢酒。遠寄風雨夕。上落葉遍空山。何處尋行跡。

朱放

放字長通。襄州人。隱居剡溪。嗣曹王臯鎮江西。辟節度參謀。貞元中。召為左拾遺。不就。

送著公歸越云。誰能愁此別。到越會相逢。長憶雲門寺。門前千萬峰。石牀堆積雪。山路倒枯松。莫學白道士。無人知去蹤。

李泌

鄴侯家傳云。泌賦詩譏揚國忠曰。青青東門柳。歲晏

復憔悴。國忠訴于明皇。上曰。賦柳為譏卿。則賦李為

譏朕。可乎。

暢當

當詩平淡多佳句。如釣渚亭云。花發多達意。鳥雁有閒情。遲暉耿不暮。平江寂無聲。天柱隱所云。荒徑饒松子。深蘿絕鳥聲。陽崖全帶日。寬嶂偶通耕。山居云。水定鶴翻去。松欹峯儼如。又寒林苞晚菊。風絮露垂揚。湖畔聞漁唱。天邊數雁行。皆有遠意。

皇甫冉

高仲武云。皇甫冉補闕。自擢桂禮闈。遂為高格。往以世道艱虞。避地江外。每文章一到朝廷。作者變色。於詞場為先輩推薦。即為伯仲。誰家勝負。或逐鹿中原。如果熟任霜封。籬疎從水渡。又衰露收新稼。迎寒葺舊廬。又燕知社日。辭巢去。菊為重陽。冒雨開。可以雄視潘張。平揖沈謝。又巫山詩。終篇皆麗。自晉宋齊梁周隋以來。採掇者無數。而補闕獨獲驪珠。使前賢失

步後輩。却立。自非天假。何以迨斯。恨長轡未騁。而芳蘭早凋。悲夫。

送韓司直云。遊吳還適越。來往任風波。復送王孫去。其如春草何。岸明殘雪在。潮滿夕陽多。季子留遺廟。停舟試一過。

西陵寄一公云。西陵遇風處。自古是通津。終日空江上。雲山若待人。汀洲寒事早。魚鳥興情新。南望山陰路。吾心有所親。姚合取四詩為極玄集

秋日東林之作云。閒看秋水心無事。坐對寒松手自栽。廬阜高僧留偈別。笈山道士寄書來。燕知社日辭巢去。菊為重陽冒雨開。淺薄將何稱獻納。臨岐終日自遲迴。

皇甫曾

張汾見訪郊居云。林中雨散早涼生。已有迎秋促織聲。三徑荒蕪羞對客。十年衰老愧稱兄。愁心自惜江離短。世事方看木槿榮。君若罷官攜手日。尋山莫算

白雲程

曾與劉長卿友善。曾過長卿碧澗別業。詩云。謝客開山後。郊扉去水通。江湖十年別。衰老一樽同。返照寒川滿。平田暮雪空。滄洲自有趣。不復泣途窮。長卿和云。荒村帶晚照。落葉亂紛紛。古路無行客。寒林獨見君。野橋經雨斷。澗水向田分。不為憐同病。何人到白雲。曾又寄長卿云。南憶新安郡。千江帶夕陽。斷猿知夜久。秋草助江長。鬢髮應成素。青松獨見霜。愛才稱

漢主題賦待田郎。長卿和云。離別江南北。汀洲葉再黃。路遙雲共水。砧迥月如霜。歲儉依仁政。姑臧相國初臨郡年衰憶故鄉。佇看宣室召。漢法倚張綱。

秦系

系呈韋蘇州云。久卧雲間已息機。青袍忽著狎鷗飛。詩興到來無一事。郡中今有謝元暉。

系字公緒。會稽人。隱泉州南安九日山。張建封聞系不可致。就加校書郎。自號東海釣客。與劉長卿善。權

德輿曰。長卿自以為五言長城。系用偏師攻之矣。韋答系云。知掩山扉三十秋。魚鬚翠碧滿牀頭。莫道謝公方在郡。五言今日為君休。蓋以五言得名久矣。年八十餘歲卒。南安人。號其峯為高士峯。山中贈張評事時。授右衛佐。云。終年常避喧。自注五千言。流水閒過院。春風與閉門。山茶邀上客。桂實落前軒。何事教予起。微官不足論。系家剡山。向隱一紀。大曆五年。人或以其文聞於留

守薛公無何奏系右衛率府倉曹參軍意所不欲以疾辭免因將命者獻詩云由來那敢議輕肥散髮行歌自採薇逋客未能忘野興辟書令遣脫荷衣家中匹婦空相笑池上群鷗盡欲飛更乞大賢容小隱益看愚谷有光輝

顧況

況字逋翁姑蘇人至德進士性詼諧與柳渾李泌為方外友德宗時渾輔政以秘書郎召及泌相自謂當

得達官久之遷著作郎況坐詩語調謔貶饒州司戶居於第山以壽終皇甫湜為況文集序云偏於逸歌長句駿發踔厲往往若穿天心出月脇意外驚人語非常人所能及最為快也其為人類其章句云中作云野人愛向山中宿況在葛洪丹井西庭前有箇長松樹半夜子規來上啼又江洲渺渺江離短疑是疑非兩斷腸句巫峽朝雲暮不歸洞庭春水晴空滿句顏垣化為陂陸地堪乘舟句大姑山盡小姑

出月照洞庭行客船。句

朱絳

春女怨云。獨坐紗窓刺繡遲。紫荆枝上轉黃鸝。欲知無限傷春意。盡在停針不語時。顧陶取此詩為類選

揚志堅

顏魯公為臨川內史。邑有揚志堅者。嗜學而貧。妻厭之。一日告離。志堅以詩送之曰。平生志業在琴詩。頭上如今有二絲。漁父尚知溪谷暗。山妻不信出身遲。

荆釵任意撥新鬢。明鏡從他別畫眉。今日便同行路客。相逢即是下山時。妻持詩詣州。請公牒求別醮。顏公案其妻曰。王歡之廩既虛。豈遵黃卷。朱叟之妻必去。寧見錦衣。污辱鄉閭。敗傷風俗。若無褒貶。僥倖者多。遂箠之。後無棄其夫者。

劉方平

秋夜泛舟云。林塘夜泛舟。蟲響荻颼颼。萬影皆因月。千聲各為秋。歲華空復晚。鄉思不堪愁。西北浮雲外。

伊川何處流。

方平春怨云。紗窓日落漸黃昏。金屋無人見淚痕。寂寞空庭春又晚。梨花滿地不開門。

戎昱

憲宗朝。北狄頻寇邊。大臣奏議。古者和親有五利。而無千金之費。帝曰。此間有士子。能為詩而姓名稍僻。是誰。宰相對以包子虛冷朝陽。皆非也。帝遂吟曰。山上青松陌上塵。雲泥豈合得相親。世路盡嫌良馬瘦。

唯君不棄卧龍貧。千金未必能移性。一諾從來許殺身。莫道書生無感激。寸心還是報恩人。侍臣對曰。此是戎昱詩也。京兆尹李巒擬以女嫁昱。令其改姓。昱固辭焉。帝悅曰。朕又記得詠史一篇云。漢家青史內。計拙是和親。社稷因明主。安危託婦人。豈能將玉貌。便欲靜胡塵。地下千年骨。誰為輔佐臣。帝笑曰。魏絳之功。何其懦也。大臣遂息和戎之論矣。

柳柳

柳與李端盧綸友善。有賊平後，送客還鄉詩云：他鄉生白髮，舊國有青山。最有思致。

薛昇

勅贈康尚書美人云：天門喜氣曉氛氲，聖主臨軒召冠軍。欲令從此行霖雨，先賜巫山一片雲。康尚書日知也。

德宗時，斬李惟岳，以功擢為深趙節度，遷奉誠軍陟晉絳。昇德宗時河東詩人也。

元載

王忠嗣鎮北京，以女韞秀歸元載。歲久見輕，韞秀勸之游學。元乃游秦，為詩別韞秀曰：年來誰不厭龍鍾，雖在侯門似不容。看取海山寒翠樹，若遭霜霰到秦封。妻請偕行曰：路掃飢寒跡，天哀志氣人。休零別離淚，攜手入西秦。

元到京，屢陳時務，深符上旨。肅宗擢拜中書，寄諸姊妹詩曰：相闥已隨麟閣貴，家風第一右丞詩。笄年解

笑鳴機婦。恥見蘇秦富貴時。元肅代兩朝宰相。貴盛無比。復為一篇以喻之曰。楚竹燕歌。動畫梁。春蘭重換舞衣裳。公孫開館招佳客。知道浮雲不久長。元貪怯被誅。上令王氏入宮。歎曰。二十年太原節度使女。十六年宰相妻。誰能為長信昭陽之事。死亦幸矣。京兆笞斃。

楊郇伯

故人出家云。盡出花鈿與四隣。雲鬟剪落厭殘春。暫

驚風燭難留世。便是蓮花不染身。貝葉欲翻迷錦字。梵聲初學誤梁塵。從今艷色歸空後。湘浦應無解珮人。

梁鎰

詠木老人云。刻木牽絲作老翁。雞皮鶴髮與真同。須臾弄罷寂無事。還似人生一夢中。明皇還西內每詠此詩

戴叔倫

戴叔倫字幼公。潤州人。師事蕭穎士。為門人冠。劉晏

管鹽鐵表王管湖南至雲安揚惠琳反馳客劫之曰
歸我金幣可緩死叔倫曰身可殺財不可得乃捨之
累遷至容管經略德宗嘗賦中和節詩遣使者寵賜
代還卒

吳明府自遠來留宿云出門逢故友衣服滿塵埃歲
月不可問山川何處來倚城容啟宅散職寄靈臺自
此留君醉相歡得幾回
除夜宿石頭驛云旅館誰相問寒燈獨可親一年將

盡夜萬里未歸人寥落悲前事支離笑此身愁顏與
衰鬢明日又逢春

送友人東歸云萬里楊柳色出關逢故人輕煙拂流
水落日照行塵積夢江湖濶憶家兄弟貧徘徊灞亭
上不語自傷春姚合取為極玄集

于鵠

鵠大曆貞元間詩人也為諸府從事居江湖間有卜
居漢陽及荆南陪樊尚書賞花詩自述曰三十無名

客空山獨卧秋。豈以詩窮者耶。老大看花猶未足。沿江正遇一枝紅。日斜人散東風急。吹向誰家明月中。

襄陽座上作

送死多於生。幾人得終老。句右張為取主客圖。

鵲送客遊邊云。若到并州北。誰人不憶家。寒深無去伴。路盡有平沙。磧冷唯逢雁。天春不見花。莫隨邊將意。垂老事輕車。

江南曲云。偶向江邊採白蘋。還須女伴賽江神。衆中

不敢分明語。暗擲金錢卜遠人。韋莊取為又玄集

李益

益姑臧人。字君虞。大曆四年登第。其受降城聞笛詩。教坊樂人取為聲樂度曲。又有寫征人歌早行詩為圖畫者。迴樂峰前沙似雪之詩是也。益有心疾。不見用。及為幽州劉濟營田副使。獻詩有感恩知有地。不上望京樓之句。左遷右庶子。年且老。門人趙宗儒自宰相罷免。年七十餘。益曰。此吾為東府所選進士也。

聞者憐益之困。後遷禮部尚書致仕卒。

閒庭草色能留馬。當路楊花不避人。句 笳簫漢恩繁。

旌旗邊色故。句 馬汗凍成霜。句

耿偉

許州書情寄韓張二舍人云。謫宦軍城老更悲。近來
頻夢到丹墀。乍燃乍滅心中火。惟鑷惟多鬢上絲。繞
院綠苔聞雁處。滿庭黃葉閉門時。故人高步雲衢上。
肯念前程杳未期。

贈朗公云。來自西天竺。持經奉紫薇。年深梵語變。行
苦俗人歸。月上安禪久。苔生出院稀。梁間有馴鴿。不
去為無機。

秋日云。返照入閭巷。憂來與誰語。古道無人行。秋風
動禾黍。

書情逢故人云。因君知此事。流恨已忘機。客久多人
識。年高衆病歸。連雲潮色遠。度雪雁聲稀。又說家林
盡。悽傷淚滿衣。

贈張將軍云。寥落邊城暮。重門返照間。鼓鼙驚雨暗。士馬過秋閒。慣守臨邊郡。曾營近海山。關西舊業在。夜夜夢中還。

疇暢當云。同遊漆沮後。已是十年餘。幾度曾相夢。何時定得書。月高城影盡。霜重柳條疎。且對樽中酒。千

般想未如。

書情逢故人以下姚合取為極玄集

偉寶應元年進士。為左拾遺。詩有家貧僮僕慢。官罷友朋疎。世多傳之。

盧綸

長安春望云。東風吹雨過青山。却望千門草色閒。家在夢中何日到。春來江上幾人還。川原繚繞浮雲外。宮闕參差落照間。誰念為儒多失意。獨將衰鬢客秦關。

綸德宗時。為戶部郎中。舅韋渠牟表其才。召見禁中。帝有所作。輒為賡和。異日問渠牟。盧綸李益何在。答曰。綸從渾瑊在河中驛。召之會。卒。文宗尤愛其詩。問

宰相盧綸文章幾何亦有子否李德裕對綸四子皆擢進士第在臺閣帝遣人悉索家笥得詩五百篇以聞。

得嶺南故人書云瘴海寄雙魚中宵達我居兩行燈下淚一紙嶺南書地說炎蒸極人稱老病餘殷勤祝賈誼莫共酒盃疎。

題興善寺後池云隔窓棲白鶴似與鏡湖鄰月照何年樹花逢幾度人岸沙青有路苔徑綠無塵願得容

依止僧中老此身。

送李端云故關衰草遍離別自堪悲路出寒雲外人

歸暮雪時少孤為客慣多難識君遲掩淚空相向風

塵何所期。得嶺南故人以下姚合取為極玄集

韓翃

侯希逸鎮淄青翃為從事罷府間居十年李勉鎮夷門辟為幕屬時已遲暮不得意多家居一日夜將半客叩門急賀曰員外除駕部郎中知制誥翃愕然曰

誤矣。客曰：邱報制誥闕入中書兩進名，不從。又請之曰：與韓翃時有同姓名者，為江淮刺史。又具二人同進。御批曰：春城無處不飛花。寒食東風御柳斜。日暮漢宮傳蠟燭，青煙散入五侯家。又批曰：與此韓翃客曰：此員外詩耶？翃曰：是也。是不誤。時建中初也。

南部新書云：昇平公主宅即席，李端擅場送王相之幽鎮，翃擅場送劉相巡江淮。錢起擅場。

德宗西幸，有神智驄如意騮二馬，謂之功臣。一日有

進瑞鞭者。上曰：朕有二駿，今得此可為三絕。因吟翃觀調馬詩云：鴛鴦赭目齒新齊，曉日花間放碧蹄。玉勒乍迴初噴沫，金鞭欲下不成嘶。高仲武云：韓員外意放經史，興致繁富，一篇一韻，朝野珍之。多士之選也。至如皇河秋一雁，砧杵夜千家。又客衣筒布細，山舍荔枝繁。又疎簾看雪捲，深戶映花關。方之前載則芙蓉出水，未足多也。其比興深於劉員外，勦節減於皇甫冉也。

題薦福衡岳禪師房云。春城乞食還。高論此中間。僧
臘階前樹。禪心江上山。疎簾看雪捲。深戶映花關。晚
送門人去。鐘聲杳靄間。

世傳。翊有寵姬柳氏。翊成名。從辟淄青。置之都下。數
歲。寄詩曰。章臺柳。顏色青青今在否。縱使長條似舊
垂。也應攀折他人手。柳答曰。揚柳枝。芳菲節。可恨年
年增離別。一葉隨風忽報秋。縱使君來豈堪折。後果
為蕃將。沙吒利所劫。翊會入中書。道逢之。謂永訣矣。

是日臨淄大按置酒。疑翊不樂。具告之。有虞侯將許
俊。以義烈自許。即詐取得之。以授韓希逸。聞之曰。似
我往日所為也。俊復能之。翊後為夷門幕府。後生共
目為惡詩輕之。

錢起

高仲武云。詩格清奇。理致清淡。粵從登第。挺冠詞林。
文宗。右丞許以高格。右丞沒後。員外為雄。革齊宋之
浮游。削梁陳之靡曼。迥然獨立。莫之與京。且如鳥道。

過疎雨。人家殘夕陽。又牛羊上山少。煙火隔林深。又
長樂鐘聲花外盡。龍池柳色雨中深。皆特出意表。標
準古今。又窮遠戀明主。耕桑亦近郊。禮義克全忠孝
兼著。足以弘長名流。為後楷式。

送僧歸日東云。上國隨緣去。東途若夢行。浮天滄海
遠。去世法舟輕。水月通禪觀。魚龍聽梵聲。唯憐慧燈
影。萬里眼中明。

送僧自吳遊蜀云。隨緣忽西去。何日返東林。世路無

期別。空門不住心。人煙一飯少。山雪獨行深。天外猿
聲夜。誰聞清梵音。

送征雁云。秋空萬里靜。嘹唳獨南征。風急翻霜冷。雲
開見月驚。塞長憐去翼。影滅有餘聲。悵望遙天外。鄉
愁滿日生。

裴迪書齋望月云。夜來詩酒興。月上謝公樓。影閉重
關靜。寒生獨樹秋。鵲驚隨葉散。螢遠入煙流。今夕遙
天末。清暉幾處愁。

送彈琴李長史赴洪州云。抱琴為傲吏。孤棹復南行。
幾度秋江水。皆添白雪聲。佳期來客夢。幽興緩王程。
佐牧無勞問。心和政自平。以上四章姚合
取為極玄集

贈闕下裴舍人云。二月黃鶯飛上林。春城紫禁曉陰
陰。長樂鐘聲花外盡。龍池柳色雨中深。陽和不改窮
途恨。霄漢常懷捧日心。獻賦十年猶未遇。羞將白髮

對華簪。

題玉山村叟壁云。谷口好泉石。居人能陸沈。牛羊上

山少。煙火隔林深。一徑入溪色。數家連竹陰。藏虹辭
晚雨。驚隼落殘禽。涉趣皆流目。將歸必在林。却思黃
綬事。辜負紫芝心。

司空曙

酬張芬有赦後見贈云。紫鳳朝銜五色書。陽春忽報
網羅除。已將心變寒灰後。豈料先生腐草餘。建水風
煙收客淚。杜陵花竹夢郊居。勞君故有詩相贈。欲報
瓊瑤恨不如。

經廢寶光寺云。黃葉前朝寺。無僧寒殿開。池晴龜出
曝。松暝鶴飛迴。古砌碑橫草。陰廊畫雜苔。禪宮亦消
歇。塵世轉堪哀。

喜外弟盧綸見宿云。靜夜四無隣。荒居舊業貧。雨中
黃葉樹。燈下白頭人。以我獨沉久。愧君相見頻。平生
自有分。況是蔡家親。

崔峒

江上書懷云。骨肉天涯別。江山日落時。淚流襟上血。

髮白鏡中絲。胡越書難到。存亡夢豈知。登高回首罷。
形影自相隨。

喜逢妻弟鄭損。因送入京詩云。亂後自孤征。相逢喜
復驚。為經多載別。欲問小時名。對酒悲前事。論文畏
後生。遙知盈卷軸。紙貴在江城。

高仲武云。峒詩文彩煥發。意思雅淡。如清磬度山翠。
閒雲來竹房。又流水聲中視公事。寒山影裏見人家。
此亦披沙鍊金。時時見寶也。

峒登進士第。為拾遺。入為集賢學士。後終州刺史。或云終玄武令。文藝傳云。終右補闕。峒寄李明府云。松堂寂寂對煙霞。五柳門前集晚鴉。流水聲中視公事。寒山影裏見人家。觀風共美新為政。計日還應更觸邪。可惜陶潛無限酒。不逢籬菊正開花。

李端

贈郭駙馬詩云。郭令公子暖尚昇平。公主此詩席上成。青春都尉最風流。二十功成便拜侯。金距鬪雞過上苑。玉鞭騎馬出

長楸。薰香荀令偏憐小。傅粉何郎不解愁。日暮吹簫揚柳陌。路人遙指鳳凰樓。

又云。方塘似鏡草芊芊。初月如鉤未上弦。新開金埒看調馬。舊賜銅山許鑄錢。揚柳入樓吹玉笛。芙蓉出水妬花鈿。今朝都尉如相顧。願脫長裾學少年。蜀路有飛泉。亭中詩板百餘篇。後薛能佐李福於蜀道過此。題云。賈掾曾空去。題詩豈易哉。悉去諸板惟留端。巫山高一篇而已。

端賦巫山高云。巫山十二峰。皆在碧虛中。回合雲藏日。霏微雨帶風。猿聲寒過水。樹色暮連空。愁向高唐望。秋風見楚宮。

茂陵山行陪韋金部云。宿雨朝來歇。空山天氣清。盤雲雙鶴下。隔水一蟬鳴。古道黃花落。平蕪赤草生。茂陵雖有病。猶得伴君行。

蕪城懷古云。風吹城上樹。草沒邊城路。城裏月明時。精靈自去來。

冷朝陽

潞州節度薛嵩有青衣善彈阮咸琴。手紋隱起如紅線。因以名之。一日辭去。朝陽為詞曰。採菱歌怨木蘭舟。送客魂銷百尺樓。還似洛妃乘霧去。碧天無際水東流。

竇叔向

叔向字遺直。京兆人。代宗時。常袞為相。用為左拾遺。內供奉。及貶。亦出為溧水令。四子登第。群以處士隱。

毗陵。韋夏卿薦之朝。德宗擢為左拾遺。代武元衡為中丞。薦呂溫。羊士諤為御史。李吉甫以二人躁險持不下。群怨吉甫。伺吉甫陰事。幾為憲宗所誅。群與兄常牟弟庠輩皆為郎。工詞章。為聯珠集。傳於時。義取昆弟若五星然。

叔向寒食賜恩火云。恩光及小臣。華燭忽驚春。電影隨中使。星輝拂路人。幸因榆柳暖。一照草萊貧。端午日恩賜百索云。仙官長命縷。端午降殊私。事盛蛟龍

見恩深犬馬知。餘生儻可續。終冀答明時。

竇常

常任武陵。寒食日次松滋渡。先寄劉員外云。杏花榆莢曉風前。雲際離離上峽船。江轉數程淹驛騎。楚曾三戶少人煙。看春又遇清明節。算老重經癸巳年。幸得柱山當郡舍。在朝常詠卜居篇。常乃叔向之子

竇鞏

代隣叟云。年來七十罷耕桑。就暖支羸強下牀。滿眼

兒孫身外事。閒梳白髮對殘陽。

寄南遊弟兄云。書來未報幾時還。知在三湘五嶺間。
獨立衡門秋水闊。寒鴉飛去日銜山。

常建

清晨入古寺。初日照高林。竹徑通幽處。禪房花木深。
山光悅鳥性。潭影空人心。萬籟此都寂。但餘鐘磬音。

題破山後禪院

歐陽永叔云。吾嘗愛建竹徑通幽處。禪房花木深。欲

效其語作一聯。竟不可得。始知造意者難為工也。

丹陽殷璠撰河岳英靈集。首列建詩。愛其山光悅鳥

性。潭影空人心。

殷璠云。高才而無貴位。誠哉是言也。曩劉禎死於文

學。左思終於記室。鮑昭卒於參軍。今常建亦淪於一

尉。悲夫。建詩似初發通莊。却尋野徑。百里之外。方歸

大道。所以其旨遠。其興僻。佳句輒來。惟論意表。至如

松際露明月。清光猶為君。又山光悅鳥性。潭影空人

心此例數十句。並可稱為警策。一篇盡善者。戰餘落日黃。軍敗鼓聲死。今與山鬼隣。殘兵哭遼水。思既邈古詞。又警絕。潘岳雖云能敘悲怨。未見如此章句也。弔王將軍墓云。嫫媸北伐時。深入疆千里。戰餘落日黃。軍敗鼓聲死。常聞漢飛將。可奪單于壘。今與山鬼隣。殘兵哭遼水。

李約

汧公勉之子也。為兵部外郎。與主客外郎張諗同官。

每單牀靜言。達旦不寐。贈韋徵君沉詩曰。我有心中事。不向韋三說。秋夜洛陽城。明月照張八。

觀祈雨云。桑條無葉土生煙。簫管迎龍水廟前。朱門幾處耽歌舞。猶恐春陰咽管絃。

從軍行云。看圖間教陣。畫地靜論邊。鳥壘天西戍。鷹窠塞上川。路長唯筭月。書遠每題年。無復生還望。翻思未別前。又候火起鷓鴣城。塵沙擁戰聲。游軍藏虜幟。降騎說蕃情。霜落澎池淺。秋深大白明。嫫媸方虎視。

不覺說添兵。

約雅度簡遠。有山林之致。在潤州。得古鐵一片。擊之清越。又養一猿。名山公。月夜泛江。登金山。鼓琴。猿必嘯和。曾佐庶人李錡。幕至金陵。屢讚招隱寺標致。一日。庶人宴寺中。明日謂曰。子嘗稱招隱標致。昨日遊宴。何殊州中。約曰。某所賞者。疎野耳。若遠山將翠幕。遮古松。用綵物裹。羶腥。浣鹿。跑泉。音樂。亂山鳥聲。此則實不如在叔父大廳也。性又嗜茶。能自煎。曰。茶須

緩火炙活火煎。活火炭有焰者。曾奉使行陝州。峽石縣東。愛渠水清流。旬日忘發。梁武造寺。令蕭子雲飛白大書。一蕭字。約自江淮竭產致。歸洛中。扁於小亭。號曰蕭齋。

陳通方

通方登貞元進士第。與王播同年。播年五十六。通方甚少。因期集。撫播背曰。王老奉贈一第。言其日暮途遠。及第同贈官也。播恨之。後通方丁家難。辛苦萬狀。

金唐詩話卷三
播捷三科。為正郎判鹽鐵。通方窮悴求助。不甚給之。
時李虛中為副使。通方以詩求為汲引。云應念路傍
憔悴翼。昔年喬木幸同遷。播不得已。薦為江西院官。

揚炎

元載末年納薛瑤英為姬。處以金絲帳。却塵褥。衣以
龍銷衣。載以瑤英體輕不勝重衣。於異國求此服也。
惟賈至與炎雅與載善。往往時見其歌舞。至贈詩曰。
舞怯銖衣重。笑疑桃臉開。方知漢成帝。空築避風臺。

炎亦贈歌云。雪面淡眉天上女。鳳簫鸞翅欲飛去。玉
山翹翠步無塵。楚腰如柳不勝春。

炎字公南。常袞長於除書。炎善德音。自開元後。言制
詔者稱常揚。元載與炎同郡。炎又元出也。故擢炎禮
部侍郎。德宗時位宰相。

裴度

公赴敵淮西。題名華嶽廟之闕門。天順中。戶部侍郎
司空圖以一絕紀之曰。嶽前大隊赴淮西。從此中原

息戰聲石闕莫教苔蘚上。分明認取晉公題。樂天求
馬。裴贈以馬。因戲云。君若有心求逸足。我還留意在
名姝。引妾換馬之事。樂天答曰。安石風流無奈何。欲
將赤驥換青娥。不辭便送東山去。臨老何人與唱歌。
中書即事云。有意効承平。無功答聖明。灰心緣忍事。
霜髮為論兵。道直身還在。恩深命轉輕。鹽梅非擬議。
葵藿是平生。白日長懸照。蒼蠅謾發聲。嵩陽舊田地。
終使謝歸耕。

韓愈

喚起窓全曙。催歸日未西。無心花裏鳥。更與盡情啼。
乃二禽名也。喚起聲如絡緯。圓轉清亮。偏鳴於春曉。
江南謂之春喚。催歸子規也。

元和十二年。裴度宣慰淮西。奏公行軍司馬。有從軍
洎途中諸篇。其間次潼關寄張十二使君詩云。荆山
已去華山來。日照潼關四扇開。刺史莫辭迎候遠。相
公新破蔡州迴。又次潼關上都統相公云。暫辭堂印

執兵權。盡管諸軍破賊年。冠蓋相望催入相。待將功
德格皇天。又樵林夜賀晉公云。西來騎火照山紅。夜
宿桃林臘月中。手把命珪兼相印。一時重疊賞元功。
敦篇皆有奧旨。元濟平。遷刑部侍郎。

十四年正月。表乞燒棄佛骨。疏入。貶潮州刺史。有次
藍關示姪孫湘詩云。一封朝奏九重天。夕貶潮陽路
八千。欲為聖明除弊事。豈將衰朽計殘年。雲橫秦嶺
家何在。雪擁藍關馬不前。知汝遠來應有意。好收吾

骨瘡江邊。是歲十月量移袁州刺史。酬張韶州詩曰。
明時遠逐事何如。遇赦移官罪未除。北望詎令隨塞
鴈。南遷纔免葬江魚。將經貴郡須留客。先惠高文謝
起予。暫欲繫舟韶石下。上賓虞舜整冠裾。

又留別張使君云。來往再逢梅柳新。別離一醉綺羅
春。久欽江總文才妙。自歎虞翻骨相屯。鳴笛急吹催
落日。清歌緩送感行人。已知奏課當徵拜。那復淹留
詠白蘋。

張籍

籍宿江上詩云。楚驛南渡口。夜深來客稀。月明見潮上。江靜覺鷗飛。旅次今已遠。此行殊未歸。離家久無信。又聽搗寒衣。或云。劉長卿餘干旅舍云。搖落暮天迥。丹楓霜葉稀。孤城向水閉。獨鳥背人飛。渡口月初上。隣家漁未歸。鄉心正欲絕。何處搗寒衣。槩相類也。籍字文昌。和州人。歷水部外郎。終主客郎中。蕃漢斷消息。死生長別離。句常於送入處。憶得別家

時。句流光暫出還入地。使我年少不須臾。句右張為取作主客圖。

送裴相公鎮太原云。盛德雄名遠近知。功高先乞守藩離。銜恩暫遣分龍節。署勅還同在鳳池。天子親臨樓上送。朝官齊出道邊辭。明年塞北諸蕃落。應起生祠請立碑。

白樂天讀籍詩集云。張公何為者。業文三十春。尤攻樂府詞。舉代少其倫。姚合讀籍詩。有詩云。妙絕江南

曲淒涼怨女詩。古風無敵手。新語是人知。

李道昌

道昌唐大曆十三年。為蘇州觀察使。一日郡城外虎丘山。有鬼題詩二首。隱于石壁之上。云。青松多悲風。蕭蕭聲且哀。南山接幽隴。幽隴空崔嵬。白日徒昭昭。不照長夜臺。雖知生者樂。魂魄安能迴。況復念所親。慟哭心肝摧。慟哭更何言。哀哉復哀哉。又曰。神仙不可學。形化空遊魂。白日非我朝。青松為我門。雖復隔

幽顯。猶知念子孫。何以遺悲惋。萬物歸其根。寄語世上人。莫厭臨芳樽。莊生問枯骨。王樂成虛言。道昌異其事。遂具奏聞。准勅令致祭。道昌為其文曰。嗚呼萬古丘陵。化無再出。君若何人。能開詩筆。何代而亡。誰人子姪。曾作何官。是誰仙室。寂寞夜臺。悲乎白日。不向紙上。石中隱出。桃源三月。深草垂楊。黃鶯百轉。猿聲斷腸。不題姓字。寧辨賢良。嗚呼哀哉。嘆昔先賢。空傳經史。終無再還。青松嶺上。嵯峨碧山。大唐正業。已

記詩言。痛復痛兮何處賓。悲復悲兮萬古墳。能作詩兮動天地。聲悲怨兮淚霑巾。感我皇兮列清酌。願當生兮事明君。是時祭後經數日。再有詩一絕于石云。幽冥雖異路。平昔忝攻文。欲知潛昧處。山北兩孤墳。後於寺山之北。果有二墳極高大。荆榛藂茂。詢諸耆老。竟不知何姓氏。至今猶存。皮日休和云。念爾風雅魂。幽咽能攻文。空令傷魂鳥。啼破山邊墳。陸龜蒙和云。靈氣猶不死。尚能成綺文。如何孤窻裏。

猶自讀三墳。

陸暢

暢字達夫。吳郡人。韋臯雅所厚禮。天寶時。李白為蜀道難以斥嚴武。暢更為蜀道易以美臯。

又經崔諫議林亭云。蟬噪入雲樹。風開無主花。

初為江西王仲舒從事。拂衣去。後遇雲陽公主下降。百僚舉暢為儋相。詩皆頃刻而成。詠簾曰。勞將素手捲蝦鬚。瓊室流光更綴珠。玉漏報來過夜半。可堪潘

岳立踟躕詠竹帳曰碧玉為竿丁字成鴛鴦綉帶短
長馨強遮天上花顏色不隔雲中笑語聲

詔作催粧五言曰雲陽公主貴出嫁五侯家天母親
調粉日兄憐賜花催鋪百子帳待障七香車借問粧
成未東方欲曉霞內人以其吳音捷才以詩嘲之云
十二層樓倚翠空鳳鸞相對立梧桐雙成走報監門
衛莫使吳畝入漢宮或曰宋若蘭姊妹作陸酬曰粉面仙郎選
尚朝偶逢秦女學吹簫雖教翡翠聞王母不奈烏鳶

噪鵲橋六宮大哈別賜宮錦榜伽餅唾盂各一
暢謁韋臯作蜀道易詩云蜀道易易於履平地臯大
喜臯薨朝廷欲繩其既往之事復閱先進兵器上皆
刻定秦二字不相與者皆造成罪名暢主疏理之曰
臣在蜀日見造所進兵器定秦者匠名也由此得釋
段成式曰暢江東人語多差誤人以為劇語初娶董
溪女每旦婢進澡豆暢輒沃水服之或曰君為貴門
女婿幾多樂事陸暢曰貴門苦禮法婢子食辣剋殆

不可過。

李翱

翱在潭州。席上有舞柘枝者。顏色憂悴。殷堯藩侍御當筵。贈詩曰。姑蘇太守青娥女。流落長沙舞柘枝。滿座繡衣皆不識。可憐紅臉淚雙垂。翱詰其事。乃姑蘇臺韋中丞愛姬所生之女。夏卿之裔。正卿之姪。曰妾以昆弟夭折。委身樂部。恥辱先人。言訖涕咽。情不能堪。亞相為之吁嘆。且曰。吾韋族姻舊。速命更其舞衣。飾以桂襦。

延與韓夫人相見。

夫人吏部之女。

顧其言語清楚。宛有冠蓋

風儀。遂於賓榻中選士而嫁之。舒元與侍郎聞之。自

京馳詩曰。湘江舞罷忽成悲。便脫蠻靴出絳帷。誰是

蔡邕琴酒客。魏公懷舊嫁文姬。

李翱薦孟郊於張建封云。茲有平昌孟郊。正士也。伏

聞執事舊知之。郊為五言詩。自前漢李都尉蘇屬國。

及建安諸子南朝二謝。郊能兼其體而有之。李觀薦

郊於梁肅補闕。書曰。郊之五言詩。其有高處。在古無

上其有平處。下顧兩謝。韓送郊詩曰。作詩三百首。杳默咸池音。彼三子皆知言也。豈欺天下之人哉。郊窮餓不得安養其親。周天下無所遇。作詩曰。食齋腸亦苦。強歌聲無歡。出門即有礙。誰為天地寬。其窮也甚矣。凡聖人奇士。自以所負不苟合於世。是以雖見之。難得而知也。見而不能知其賢。如勿見而已矣。知其賢而不能用。如勿知其賢而已矣。用而不能盡其才。如勿用而已矣。盡其才而容讒人之所間者。如勿盡

才而已矣。故見賢而能知。知而能用。用而能盡其才。而不容讒人之所間者。天下一人而已矣。郊下第詩曰。棄置復棄置。情如刀劍傷。又再下第詩曰。一夕九起嗟。夢知不到家。兩度長安陌。空將淚見花。而後及第。有詩曰。昔日齷齪不足嗟。今朝曠蕩恩無涯。青春得意馬蹄疾。一日看盡長安花。一日之間。花即看盡。何其速也。果不達。

劉義

劉又節士也。少放肆為俠會。因酒殺人亡命。會赦出。更折節讀書。能為歌詩。然恃故時所負。不能俛仰貴人。聞韓愈接天下士。步謁之。作冰柱雪車二詩。出盧孟右。樊宗師見為獨拜。後以爭語不能下賓客。因持愈金數斤去。曰。此諛墓中人得耳。不若與劉君為壽。愈不能止。歸齊魯。不知所終。

揚巨源

揚巨源以三刀夢益州。一箭取遼城得名。故樂天詩

云。早聞一箭取遼城。相識雖深有故情。清句三朝誰是敵。白鬚四海半為兄。貧家薙草時時入。瘦馬尋花處處行。不用更教詩過好。折君官職是空名。巨源後拜省郎。樂天復以詩賀云。文昌新入有光輝。紫界宮牆白粉闈。曉日雞人傳漏箭。春風侍女護朝衣。雪飄歌句高難和。鶴拂煙霄老慣飛。官職聲名俱入手。近來詩客似君稀。

巨源字景山。大中時為河中少尹。

何事慰朝夕。不踰詩酒情。山河空道路。蕃漢共刀兵。禮樂新朝市。園林舊弟兄。向風一點淚。寒晚暮江平。右張為取作主客圖。

歐陽詹

歐陽詹字行周。泉州人。初見拔於常袞。後見知於退之元賓。終於四門助教。李貽孫序其文曰。君之文周詳切於情故。叙事重複。宜其掌代文柄。以變風雅。一命而卒。天其絕乎。子賈早死。孫澥。

途中寄太原所思詩曰。驅馬漸覺遠。迴頭長路塵。高城已不見。況復城中人。去意自未甘。居情諒猶辛。萬里東北晉。千里西南秦。一履不出門。一車無停輪。流萍與匏繫。早晚期相親。或曰。詹遊太原。悅一妓。將別。約至都相迎。故有早晚期相親之句。妓思之不已。得疾且甚。乃刀其髻藏之。謂女弟曰。歐陽生至。可以為信。又作詩曰。自從別後減容光。半是思郎半恨郎。欲識舊來雲髻樣。為奴開取縷金箱。絕筆而逝。及詹至。

如其言示之。詹啓函一慟而卒。孟簡賦詩哭之。序云。穆玄道訪予。常嘆其事。玄道頗惜之。

袁高

禹貢通遠俗。所圖在安人。后王失其本。職吏不敢陳。亦有奸佞者。因茲欲求伸。動生千金費。日使萬姓貧。我來顧渚源。得與茶事親。毗輟耕農來。採採實苦辛。一夫且當役。盡室皆同臻。捫葛上歌壁。蓬頭入荒榛。終朝不盈掬。手足皆皴鱗。悲嗟遍空山。草木為不春。

陰嶺牙未吐。使者牒已頻。心爭造化力。光從銀臺筠。選納無晝夜。搗聲昏繼晨。衆工何枯槁。俯視彌傷神。皇帝尚巡狩。東郊路多堙。周迴遠天涯。所獻愈艱勤。況值兵革困。重茲困疲民。未知供御餘。誰合分此珍。顧省忝邦守。又慚復因循。茫茫滄海間。丹憤何由伸。右高所賦茶山詩也。案唐制湖州造貢茶最多。謂之顧渚貢焙。歲造一萬八千四百斤。大曆後始有進奉。建中二年高刺郡進三千六百串並詩。此一章刻石。

在貢焙。故杜鴻漸與楊祭酒書云。顧渚中山紫笋茶
兩片。此物但恨帝未得嘗。實所嘆息。一片上大夫。人
一片充昆弟同歡。開成三年。以貢不如法。停刺史裴
充官。

閻濟美

濟美大曆九年春下第。將出關。獻座主張謂詩六韻
曰。蹇諤王臣直。文明雅量全。望爐金自躍。應物鏡何
偏。南國幽沈盡。東堂禮樂宣。轉令游藝士。更惜至公

年。芳樹歡新景。青雲泣暮天。唯愁鳳池拜。孤賤更誰
憐。謂覽之問。失第之因。具以實告。謂深有遺才之歎。
乃曰。所投六韻。必展後效。明年濟美自江東。繼薦就
試東都。謂後主文雜文已文已過。繼欲帖經。濟美辭
以不能。謂曰。禮闈故事。亦許作詩。續帖遂命天津橋
望洛城殘雪題。濟美曰。新霽洛城端。千家積雪寒。未
收清禁色。偏向上陽殘。既而日勢已晚。詩未就。謂曰。
據見在將來一覽稱賞。遂唱過盧景莊。謂曰。前足下

試蜡日祈天宗賦以魯丘對衛賜則子貢也乃作駟字誤矣方悔之明日謂曰天寒急景諸君文卷不成未可以呈宰相請重送納既而索舊卷則駟字上朱點在焉易卷之意蓋有在也到闕謂揖濟美曰前日春間遺才所投六韻不敢暫忘幸副素懷矣濟美紀其事曰前朝公相許與定分一面不忘濟美哉

裴交泰

長門怨云自閉長門經幾秋羅衣濕盡淚還流一種

蛾眉明月夜南宮歌吹北宮愁范攄曰近日舉場詩尤新章孝標對月云長安一夜千家月幾處笙歌幾處愁有類乎裴交泰

裴貞元間詩人

劉空龜紀事作皂

韋莊載竈長門怨云淚滴長門秋夜長愁心和雨到昭陽淚痕不學君恩斷拭却千行更萬行

元稹

損聞西蜀薛濤有辭辯。及為監察使蜀。以御使推鞠
難得見焉。嚴司空潛知其意。每遣薛往。泊登翰林以
詩寄曰。錦江滑膩蛾眉秀。生得文君與薛濤。言語巧
偷鸚鵡舌。文章分得鳳凰毛。紛紛辭客多停筆。箇箇
公侯欲夢刀。別後相思隔煙水。菖蒲花發五雲高。後
廉問浙東。乃有劉採春自淮甸而來。容華莫比。元贈
詩曰。新粧巧樣畫雙蛾。謾裏常州透額羅。正面偷勻
光滑芴。緩行輕踏皺紋波。言辭雅措風流足。舉止低

迴秀媚多。更有惱人腸斷處。選詞能唱望夫歌。望夫
歌卽羅噴之曲也。元云。在淞河七年。因醉題東武。其
詩曰。役役行人事。紛紛碎簿書。功夫兩衙盡。留滯七
年餘。病痛梅天發。親情海岸疎。因循未歸得。不是憶
鱸魚。盧侍郎簡求戲曰。丞相雖不為鱸魚。為好鏡湖
春色耳。謂採春也。

公先娶京兆韋氏。字蕙叢。韋逝。為詩悼之曰。曾經滄
海難為水。除却巫山不是雲。

出本
事傳

樂天在洛大和中。鎮拜左丞相自越過洛。以二詩別
樂天云。君應怪我留連久。我欲與君辭別難。白頭徒
侶漸稀少。明日恐君無此歡。又云。自識君來三度別。
這回白盡老髭鬚。戀君不去君須會。知得後回相見
無未幾。死於鄂。樂天哭之曰。始以詩交。終以詩訣。茲
筆相絕。其今日乎。

屈指負元舊朝士。幾人同見大和春。感興句 兒歌揚柳
葉。妾拂石榴花。句 遠路事無限。相逢唯一言。月色照

榮辱長安千萬門。逢白公句

白居易

張為以居易為廣大教化主。取其讀史詩云。含沙射
人影。雖病人不知。巧言誣人罪。至死人不疑。掇蜂殺
愛子。掩鼻戮寵姬。弘恭陷肅望。趙高謀李斯。陰德既
必報。陽禍豈虛施。人事雖可罔。天道終難欺。明即有
刑辟。陰即有神祇。苟免勿私喜。鬼得而誅之。
又取得意減別恨。半酣還遠程之句。又人吏留不得。

直入故山雲之句。又長生不似無生理。休向青山學煉丹之句。又白髮鑷不盡。根在愁腸中之句。又與薛濤云。峩眉山勢接雲霓。欲逐劉郎此路迷。若似剡中容易到。春風猶隔武陵溪。

樂天不為贊皇公所喜。每寄文章。李絳之一篋未嘗開。劉夢得或請之曰。見詞則迴吾心矣。樂天未冠。以文謁顧況。況覩姓名。熟視曰。長安米貴。居大不易。乃捲卷讀其芳草詩。至野火燒不盡。春風吹又生。嘆曰。

吾謂斯文遂絕。今復得子矣。前言戲之耳。皇曾入
樂天賦性曠達。其詩曰。無事日月長。不羈天地濶。此曠達之詞也。孟郊賦性褊狹。其詩曰。出門卽有礙。誰謂天地寬。此褊狹之詞也。然則天地又何嘗礙。郊自礙耳。

樊素善歌。小蠻善舞。樂天賦詩有曰。櫻桃樊素口。楊柳小蠻腰。至於高年。又賦詩曰。失盡白頭伴。長成紅粉娃。因為揚柳詞。以託意云。一樹春風萬萬枝。嫩於

金色軟於絲。永豐東角荒園裏。盡日無人屬阿誰。及
宣宗朝。國樂唱是詞。帝問永豐在何處。左右具以對。
遂因命取永豐柳兩枝植於禁中。自感上知。又為詩
云。一樹衰殘委泥土。雙枝移種植天庭。定知此後天
文裏。柳宿光中見兩星。洛下文士無不繼作。韓常侍
琮時為留守。亦有詩和云。折柳歌中得翠條。遠移金
殿種青霄。上陽宮女吞聲送。不分先歸舞細腰。盧貞
和一樹依依在永豐。兩枝飛去杳無蹤。玉皇曾採人

間曲。應逐歌聲入九重。示意也。

全唐詩話卷之二 終

合和紀元歲。辛酉外條。士伸枝梓。藏于夙。龔

全唐詩話卷二

問曲終本意人其重亦意也

